

صالة سفر

هنا المطار

صاله سفر

و البعد ذنب بيغُتفر

واكيد بعادي مش هروب

و انا حد مؤمن بالقدر

مؤمن بأن الليل سهر

و السعي واجب ع البشر

و إن النجاح محتاج تعب

و مفيش تعب بيروح هدر

تبّت في جواز السفر

تبّت في خيوط الأمل

بأجندة الشعر الجديد

بدّلت كشكول الزجل
جوه المطار
أمي و أبويا و دنيتي
و أختي و أنا و شنطة بعجل
جرّتها من خلفي
جرّيتني قدامها
بتزقني علشان تهج من الوجد
طمنتها بأيدي
حسيت بلهفتها
كان نفسها تهرب لأقرب مُتّسع
علشان ما تفضي بحملها
بناطيل غوامق م الزعل
على كام قميص طاله المَلل
على فرش كان لون الحنين
و معاه غطا
متعطرين بالفلسفه

و ايدين حبيبتى الساقعانيين
متشعبطه
و مكتفاني بالدفا
و اختي اللي غرق دمعها
ياقة قميصي
و الدمع سايل ما اکتفى
كان دور أبويا ف السلام
وعيوننا كانوا هربانيين
فكان سلامنا بالقلوب
أحسن ما تتلاقى العنين
و اقرب من المألوف
حسيت ساعتها بخوف
فطال الحزن مع أمي و لما اتفك
سرقت من حزنها روحها
و برفانها

حسيت كأني بقيت في خانه اليك
مابين الروحه و الرجعه
و أحزانها
والدي العزيز ...
أمي ...
أختي اللي من دمي
هاجر حبيبتي و دنيتي
إهتموا
و إهمي
البعد لو كان من دهب
متقلقوش هرجع
و الغربه لو هتهدني
أنا قدها و أجدع